

香

案

牘

陳繼儒纂

中華書局

香案牘序

甲午三月郡文學就試荆溪。余出城南讀書孟直夫郊居。不五日而客有跡者。挈罍相餉。余與客班坐樹下。視樹影所至。輒起遷席。風日淡宕。則枕籍紅花田。以隱囊博山酒鎗佐之。有古陶斗柄如鸚鵡啄。腹如瓠。丹砂繡蝕。厚如指甲者數片。班班桃花色。而斟酒有異香。蓋三代物也。出以酌客。客爲引滿。已忽聞林端反舌聲。時改夏矣。而聲小澁。余戲指之曰。何異文通才盡。又笑曰。豈老氏多言數窮耶。客亦大笑。醉去。余與直夫退而相對。起居無恒。時憩磯頭橋畔。布衲寬博。落落不知何如人。村中父老小兒。習余無他。則剪薔薇花。縛蔬笋饋余。余愧謝不能當。已復余山人。又摘茶寄余。試以惠泉紺碧沁齒。蕉衣竹粉。瀟瑟北窗。爲枕書而臥。臥起。抽一編讀之。則浮雲山道士仙史在焉。出道藏醮字函卷三十有二。所載古今真人列仙四百四十有七。顧其言不雅馴。余與直夫汰而洗之。存其奇逸可喜者。精爲一卷。以資麈尾。其名香案牘者何居。曰仙牘玉宸吏司之。如項羽所謂書不過記名姓而已。

清懶居士陳繼儒志

香案牘目錄

列仙七十二人

軒轅

尹喜

范蠡

鬼谷

介推

陸通

鹿皮翁

阮丘

玄俗

白石生

宋來子

古丈人

董謁

季充

孟岐

黃安

涉正

孫博

班孟

柳融

王興

桐君

趙丙

王喬

周大賓

安期生

彭宗

司馬季主

王探

章玉子

唐公昉

朱仲

劉安

劉京

梅福

欒巴

孔元方

李意期

張仲常

王喬

趙威伯

劉偉道

王中倫

李阿

介象

張道陵

王暉

鮑靚

姜伯貞

元藏機

陳簡

葛玄

鄭思遠

黃野人

許翹

陶弘景

王遠知

司馬承禎

李含光

許遜

香案牘

目錄

香案讀目錄

許大

嚴達

摸先生

胡惠超

孫徹

王元芝

單道開

丁玄真

范豹

顏真卿

寇謙之

伊祁玄解

香案牘

軒轅

華亭陳繼儒纂

帝列珪玉于蘭蒲席上。春雜寶爲屑。以沉榆之膠。和之爲泥。畫野分州。別尊卑華戎之異。濟南人獻明堂圖。複道上有樓。從西南入。此樓之始。螻蛄大如牛羊。驢大如虹。以應土德。

尹喜

文始先生生室中。陸地生蓮花。結草爲樓。精思至道。

范蠡

蠡好服桂飲水。賣藥蘭陵。於北邙山得仙異。

鬼谷

秦時疫死者。有鳥如鳥。銜草覆其面遂活。有司上聞。始皇遣使賫草以問先生。云此瓊田中養神芝。其葉似菰而不蕰生。一葉能起一人。

介推

子推與趙宣子遊。旦有黃雀在門上。晉公重耳異之。後見東海邊。爲王俗翁賣扇。

陸通

楚狂接輿。好食橐盧木實及蕪菁子。在峨眉山。

鹿皮翁

岑山頂有泉。人不能到。鹿皮翁作轉輪懸閣梯道四間。上其巔。

阮丘

丘耳長七寸。口中無齒。

玄俗

俗日中無影。

白石生

生煮白石爲糧。問之何不霞舉。笑曰。天上多有至尊相奉。事更苦于人。間爾時號爲隱遯仙人。

宋來子

來子常灑掃一市。

古丈人

嵩華松下古丈人一女子。二曰老人秦之役者。女宮人。合爲殉。幸脫驪山之禍。匿此。

董謁

謁乞大羊皮爲裘。編荆爲牀。聚鳥獸毛而寢。性好異書。見輒題掌還家。以片籀寫之。舌黑掌爛。人謂謁掌錄而舌學。

季充

充號負圖先生。伏生十歲。就石壁中受充尙書。授四代之事。伏生以繩繞腰領。一讀一結。十尋之繩皆成結矣。充餌菊朮。經旬不語。人問何以答曰。世間無可食。亦無可語者。

孟歧

岐嘗云。見周公旦抱成王以朝于周廟。岐時侍周公陞壇。公上。岐以手摩成王足。周公以玉笏遺岐。岐常寶執。每以衣袂拂拭笏。笏今銳欲折耳。

黃安

安坐一神龜。廣三尺。行則負龜而趨。曰。伏羲氏始造網罟。獲龜以授我。背已平。此龜畏日月光。三千年一出頭。我坐此以來。龜出頭者五矣。

涉正

正閉目二十年。弟子固請之。正乃開目。有聲如霹靂。而閃光若電。已復還閉。

孫博

博口中吐火。指樹火生。葉旋焦枯。又能于水面布席作樂。使衆人舞于上。不沒不濡。引鏡爲刀。屈刀成鏡。

積時不改。

班孟

孟坐空虛中與人語。又能入地。初沒足至腰及胸。漸漸但餘冠幘。良久盡沒。又吸人屋上瓦。瓦飛入簷楣。紛如落葉。

柳融

融取杯呪成龜。煮之可食。腸臟皆具。而杯成龜殼。煮取肉則殼還成杯矣。

王興

秋長山洞穴中。有千歲金蟾蜍。山頂有瓊花。木徑八九尺。葉如白檀。花如芙蓉。香聞數里。興常見之。

桐君

君入山得鳴石雞。舂碎爲藥服之。有聲氣。雞色丹。大如燕。常在地中。應時而鳴。吳寶鼎元年貢琥珀燕。置靜室。室中時一鳴翔。此之類也。

趙丙

丙舟行遇人。酌水爲酒。削一楫爲脯。並得醉飽。

王喬

武陽北平山有白蝦蟆。謂之肉芝。王喬食以仙去。武陽山祠有三王喬。一太子晉。一葉令王喬。一食肉芝。

王喬。

周大賓

賓善鼓琴。彈獨絃而八音自和。以教糜長生孫廣用。廣用卽孫登也。

安期生

生以醉墨灑石上。皆成桃花。

彭宗

宗能以一氣誦五千文。通爲兩過音聲清暢。

司馬季主

季主顏如少女。鬚三尺。黑如墨。有子二。男名法育。女名濟華。俱在委羽山。

王探

探師司馬季主。與人行。身散雲霧。或屹立平地。俄起崇山。

章玉子

玉子含水噴成珠玉。與弟子行。各丸泥爲馬乘之。一日行千里。

唐公昉

公昉昇仙。雞犬皆去。惟鼠惡其穢垢。不將。鼠自悔。一月三吐。易其腸束。廣微所謂唐鼠是也。

朱仲

漢高后下書募三寸珠。仲賁珠詣闕。魯元公主從仲求珠。仲獻四寸珠。景帝時復來獻三寸珠數十顆。

劉安

淮南王安見太清仙伯。以坐起不恭。謫守天廁。

劉京

京授九子丸于王公。公時已七十歲。服之御八十妾。生二十兒。

梅福

墨池在南昌縣。水竹幽蔚。王右軍典臨川郡日。每過此盤礴不能去。因號墨池。先是福種蓮花池中。嘆曰。生爲我酷。身爲我梏。形爲我辱。妻爲我毒。遂棄妻入洪厓山。

樂巴

廬山廟有鬼物。能使江湖中分風舉帆。巴下檄勒鬼踪跡。鬼走齊郡。化爲書生。談五經。太守妻以女。巴勅殺之。空中刀下。狸頭墮地。太守女已生一兒。俄化爲狸。亦殺之。

孔元方

元方以杖拄地。一手抱杖倒豎。頭在下。足向上。以一手持酒杯倒飲之。

李意期

人有說四方郡國宮觀市里期卽撮土成之經見者詫其酷類但纖小耳

張仲常

仲常埋甕室下對妻子轟飲恣飽董血及發甕已多度甕中經日不腐

王喬

喬葬蒙城東自成塚其夕縣中牛皆流汗喘乏或云墓橋山卽太子晉

趙威伯

威伯善嘯若衝風之激長林衆鳥羣鳴須臾雲翔其上冥霧四合零雨其濛

劉偉道

偉道學仙仙人試以白髮一莖懸十萬斤巨石鼠嚙髮垂垂欲絕使偉道臥其下了無怖色蓋二十年

王中倫

晉武帝太康中田宣隱于鳴石岩下葉風霜月拊石自娛每見一人着白單衣徘徊岩上清曉方去自言
王中倫生周宣王時愛此石聲清激故輒留聽

李阿

阿蓬犇牛以足脛置車下轅其骨皆折阿死須臾復生足亦如故

介象

象入東岳受禁制之術能令一市人皆坐不起。有客種黍山中。患羣猴揉食之。乞辟猴法。象告汝見猴羣第語之。吾已告介君。介君教汝莫食。明日客試以象言語。猴果連臂投林而去。

張道陵

道陵居渠亭山。見青童絳節前導曰。老君至矣。從者二人。雋似弱冠。或指曰。此子房。此子淵。

主暉

暉種黃精。虎爲之耕。豹爲之耘。出入亦乘虎豹。具轡轡行。鞭策如乘馬。

鮑靚

靚與葛稚川善。每來門無車馬。獨雙燕往還。或怪而網之。則雙履也。墉城集仙錄云。靚以女妻稚川。

姜伯貞

伯貞值史伯真命立日中。背後觀之。其心不正。因教之服石腦。

元藏機

機有馴鳥三類。黃鶴時翔空中。呼之立至。能授人語。常航海飄至一島。島人曰。此滄洲也。產分蒂瓜。長二尺。碧棗丹栗大如梨。池中有四足魚。金蓮花。婦人採爲首飾。曰不戴金蓮花。不得在仙家。

陳簡

簡遇道者引至石室。屬以圯上素書一軸。曰汝有書性。好爲我書。發標視皆古篆籀文。心難之。度無可遜。

避。遂按本半日書竟。

葛玄

玄遇親朋輒邀止。折草刺樹以杯盛之。汁流如泉。杯滿卽止。飲之皆旨。酒取瓦礫草木之實勸客。皆脯棗。指蝦蟆使飛。龜使舞。應節如人。爲客行酒。杯自至前。不盡杯不去。

鄭思遠

思遠每出行乘虎。二虎雛負經以從。橫江橋逢許隱。具煖藥酒。虎爲拾柴燃火。隱患齒痛。求虎鬚熱插齒間。思遠拔之。虎帖地不動。

黃野人

野人遊羅浮。長嘯數聲。遞響林樾。宋咸淳中。客有戴烏方帽着韓。往來羅浮山中。見人則大笑反走。三年不言姓氏。他日醉歸。忽取煤書壁云。雲意不知滄海。春光欲上翠微。人間一墮千劫。猶愛梅花未歸。蓋野人之儔歟。

許翹

真人告翹曰。學道當如穿井。井彌深。土彌難出。

陶弘景

弘景右膝有數十黑子。作七星文。少便鞍馬善射。晚皆不爲。惟聽吹笙。借人書隨悞治定。

王遠知

遠知曇首之子。母夢靈鳳有身。僧寶誌曰。生子當爲神仙宗伯。

司馬承禎

禎善金剪刀書。腦中有小兒誦經聲。玲玲如振玉。額上小日如錢。耀射一席。

李含光

含光工篆隸。或稱過其父。一聞之終身不復書。

許遜

遜爲蜀旌陽令。既歸。父老送之如雲。有不返者。乃于宅東隙地。結茭以居。狀如營壘。多改氏族以從許姓。號許家營。

許大

大爲真君。掃髮。夫婦隱于西山。不欲人識。改姓曰午。旋改曰干。夫婦皆解詩。許大詩云。不是藏名混世俗。賈柴沽酒貴忘言。妻續云。兒家祇在西山裏。除卻白雲誰到門。

胡惠超

超身不甚長。然每處稠人中。首獨昂出其上。雖至長者止及肩下。指地中古金石寶器。穿之如言而獲。

單道開

開服細石子。一吞數枚。唐子西贊曰。世人茹柔。剛則吐之。匙抄爛飯。牛口如飼。至人忘物。剛柔一致。其視食石。如啗餅餌。北平飲羽。出于無心。食石之理。于此可尋。我雖不能。而識其理。庶幾漱之以礪厥齒。

范豹

豹云。東方朔乃黠我。我小兒時。數與之狡獪。宋文帝召見。豹從東宮過。指宮門曰。此中有博勞鳥。奈何養賊。

寇謙之

成公興備于寇之從母家。使墾田。寇一日于林下布筭。周髀曆法不合。公興教之。應手而成。

嚴達

周武帝建德中。詔達至便殿。時已汰浮屠氏。復欲漸芟黃冠。上問道與釋孰優。對曰。主優而客劣。上曰。主客奚辨。曰。釋出西方。得非客乎。道出中夏。得非主乎。上曰。客既西歸。主無送耶。對曰。客歸則有胡土。主在則無損中華。去者不追。居者自保。又何送乎。上大笑得免。

孫徹

徹隱遁宿于木杪。編葛爲席。合目端坐。其友馬儉思之。取葛席至靜室。供養數日。輒聞席上有人語。

丁玄真

毒龍潭二龍飛入殿。與張僧繇畫龍圖。風雨震沸。玄真畫鐵符鎮潭。龍穿山而去。復釘畫龍之目。其患乃

止。

顏真卿

白紫清云。真卿今爲北極驅邪院左判官。

伊祁玄解

西域進方員二美玉。玄解曰。此龍虎玉也。員生于水。龍寶之。方生于山。虎寶之。詢使人果得之。漁獵者。

摸先生

先生束雙髻于頂。攜小竹筭賣藥。有疾者手摸之。輒愈。人呼爲摸先生。

王元芝

元芝數歲時。夜出門。見一道士。隨之入江。在水底月明中行。不見泥沙。水隨步自開。路傍一物十丈許。如龍如蛇。有五色光。道士指曰。此水母也。見之長生。自是便能逆風掛帆。泛水安坐。

乙未春正月。余正愁窘中。仲醇以一編貽余。曰。香案牘。載神仙事奇矣。而人不數事。事不數語。又皆奇之奇者。仲醇選勝恬澹園。而猶有艷心乎。嗚呼。人當繁憂總集。心骨沸熱。懣若寐。搖若曳。魂氣徊徊。未返之間。粗法難調。細諦不入。非以世外儼洋之語滌之。誰有能爽然解者。人心有目。目又有捷。透局啓鐸。必從喜根。今人好新是病。病卽是藥。譬如望梅。實能止渴。渴卽止矣。亦復無梅。非實非虛。是方便法。仲醇所以刪多就簡。不著事迹。不詮名理者。殆謂說夢說幻之教。以恍惚杳渺爲佳。不以粉塊鏤空爲

勝。寧使人味食得食。無使人遇食失食。仲醇不云乎。多言數窮。六合以外。方寸以內。蓋有才之所不能盡者。則牘如是足矣。

太原王衡跋